

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板在該激啊激仔¹。無人出入个魚市場裡肚，斯單淨留等，幾蕊²孤栖个電火，還過，幾臺推啊推仔³个抽風機。

魚市場外背闊闊个停車場這片，犖花犖花仔⁴停等幾臺自用車，還毋想睡个駛車人，有人帶等罐頭來供流浪狗、也有人帶等釣槓來湊月光釣魚仔。魚市場該片遠遠个停車場脣頭，幾下个越夜越有元氣个後生人，載等掛有大喇叭个音響，摺車後斗撒向天、三臺車仔比比企，在該咚滋咚滋⁵尋月光共下跳舞。

正手片个音樂聲撓⁶到佢个腳底痲痲⁷，毋過，左手片騎等過个兩臺奧多拜，錫著佢个目光。佢跔等佢兜个身影，行上兩百八十

公尺長个笨鯊橋，想去看，掛等頭燈个兩隻網魚人，係愛網麼个魚仔？月光也勾頭出來咧，一浪一浪个水紋，在月光下看到清清楚楚，一張魚網、兩個網魚人，落網、收網，撈起來个係一網个月光。雖然，連魚屎都無，毋過，佢兜還係有講有笑，佢想，佢兜怕係為著愛打嘴鼓來个，網魚仔，單淨係兩同年想在月光下共下寮个理由定定。

橋下个河壩水，也認同佢个想法，「係啊，係啊！」緊應緊大聲，佢緊聽緊生趣。毋過，摺佢看真來，該「係啊，係啊！」个聲哨，怕係河壩水分海浪打轉來，抑係海浪激上河壩水个聲啊！

毋多知仔，就分佢行過笨鯊橋咧。橋這片，日時頭分人箭到穀穀个自行車，這下通棚一列一列企好、企正，在月光下恬靜。光華華个路燈下，無人上下咧，斯單淨一隻揸等螺殼个毛蟹，對白沙堆勾頭出來又囡倒轉去，對路脣趨過來又趨倒轉去，自家在月光下搞囡人尋。佢企在路脣，看毛蟹、看流流流流个河壩水，在共樣个月光下，當像分佢看著，頭擺，該一大陣笨鯊入港時，客家打漁人佢兜面町⁸个笑容。

¹ 激啊激仔：音 gieb` a+ gieb` er；液體來回晃動貌。

² 幾蕊：音 gi` lui；幾盞。

³ 推啊推欸：音 kog` a+ kog` er；此為形容機器轉動的聲音和狀態。

⁴ 犖花犖花仔：音 lo` fa` lo` fa` er；稀疏間雜著其他花色的樣子。

⁵ 咚滋咚滋：音 dung` zii` dung` zii`；形容電子音樂的節奏聲。

⁶ 撓：音 neu`；搔、抓。

⁷ 痲痲：音 hoi hoi；癢癢的感覺。

⁸ 面町：音 mien` nen`；臉上。

編號 2 號

【阿婆个烏鷄】曾菁怡原作

戴莊下樹多、田多、鳥仔多，天時好个時節，打早就做得看著電線頂高，佢共下像言睡醒个斑鳩，抑係歸群嘍嘍嘎嘎在路脣絡食个屋簷鳥，成時還看得著在天頂飛來飛去个鷄婆。有一種鳥仔歸身个毛烏疏疏，斯在翼胛尾摺鳥尾有一息息仔白毛，目珠、背摺該瘦夾夾个腳係黃色个，安到烏鷄。佢總係跳啊跳、跳啊跳仔，毋多知就帶佢跳落有佢婆个回憶裡肚。

阿婆係篤實个莊下婦人家，溫和恬靜，為著家庭，一生人就像挨挨轉个極樂仔無時間。天言光就跣床炆豬菜分豬仔食；天矇矇就揸等衫褲去河壩脣洗衫；衫褲晾好又趕緊去菜園落肥、淋水。除忒這兜，還愛煮三餐、畜頭牲、做田事……。放晝該下，阿婆正有好歇睏，佢最愛坐在門口个藤椅頂高，目絲絲仔享受微風吹在面町¹个鬆爽。

有一日放晝，阿婆正坐下來準備歇睏，目珠影著外背个竹筴下有一團烏疏疏个東西在該停動，行兼去看，發現係一隻還毋會飛个烏鷄鳥子。阿婆摺佢捉在手町，從頭看到尾、從尾看到腳。

一下揸佢个頭那頂摺面頰卵；一下掀開佢幼嫩个翼胛，搨過來搨過去，像細人仔抓著生趣个玩具，看到目金金無眨目。

阿婆想起閒間仔有一隻頭擺阿叔畜鷹哥个鳥籠仔，就決定摺這隻鳥子畜起來咧。逐朝晨，阿婆面洗好就去看籠仔裡肚个飼料還有無？愛過添水無？一有閒就摺鳥籠仔拚到淨俐淨俐。食飽晝，阿婆就會摺藤椅徙到籠仔脣，佢兼籠仔教烏鷄講話：「天光咧！」、「食飽言？」、「大家好！」、「正來奈」……。日見日，該烏鷄看著人也會講阿婆教佢个話咧。

無想著，有一日朝晨，籠仔門毋知仰般分人打開來，裡肚个烏鷄也毋知去哪位咧？阿婆兩隻手捧等飼料，頭磬磬仔企在籠仔脣，久久正接受烏鷄毋見忒个事實，還喃喃喃喃講：「恁打爽，畜恁久咧！」該隻鳥籠仔又收落閒間肚園咧。

這拜日阿婆做對年，阿姆交代愛轉老屋祭拜。燒金該下，幾下隻烏鷄在竹頭下跳啊跳、跳啊跳仔，成時擎頭這看該看，背尾就飛到竹林肚去，斯伸風吹過竹葉絮絮疏疏²个聲。毋知阿婆這下有摺佢講話个烏鷄無？

¹ 面町：音 mien^ˇ nen^ˋ；臉上。

² 絮絮疏疏：音 si^ˇ si^ˇ so^ˇ so^ˇ；狀聲詞。

【 燿窯仔 】 劉玉蕉原作

打早，斯聽著阿婆交代阿姆，去市場割兜豬肉、買兜萋魚仔轉來，「欸，奇怪！有麼人做生日係無？」問過阿婆正知，係滿姑愛轉外家，怪毋得阿婆恁歡喜！探著滿姑轉來個時間，佢走去莊頭阿惜姨個雜貨店等，頭勾勾緊看。姑丈個車吉駛兼，佢斯走出去搵手咧，姑丈個車仔一頓恬，佢斯蹶上車，滿姑笑等講：「屎拙吉坐燒，斯愛下車咧，恁大閒情！」，知佢歡喜，佢尖落車肚斯摻姑表姐妹大聲搞起來。

滿姑帶個等路已錫人，逐儕都有一份外，車後斗還有一大布袋個番薯，阿婆講：「番薯恁多仰結煞，無斯來燿窯仔¹好咧，屋背田竇肚個泥，上禮拜正翻過，應該乜燥咧，佢俚來燿窯仔，愛無？」「好哦！湛啦！」聽著有好搞，佢這兜黏時斯應。

起窯仔哩啲，阿爸拗三砵大泥團做門，窯身斯尋像佢拳頭嫵恁大個泥砵來結，疊高了後還愛慢慢收兼來，幾下到，結到半爛燦斯扁下來，「唉，老刀嫵無鋼咧，無恁該食哦！」最尾還麻煩姑丈搵手，正順利搵好。窯仔一起好，阿哥斯下命令咧，佢喊佢

摻姑表姊妹去撿樵，阿姊負責起火、架樵，大姊當倚恃得，火分佢掌到猛猛猛，紅紅個火舌對泥砵縫仔鑽出來，像愛擘嘴食人樣，害佢這兜閃到遠遠遠，無幾久，泥砵斯像甜柿恁樣紅啾啾咧！

「好勢哩啲，樵毋好再過架咧，等樵退出來，斯做得擲番薯落去咧！」阿婆恁樣講。火炭掙開來，番薯斯一條一條擲落窯肚去。「哇！」表哥個擔竿一掙落去，紅紅個泥砵跔等扁下來，堵好奔在番薯等高，「建設難，破壞容易」，細人仔輪等掙泥砵，逐個都搵到一頭一面，背尾還係姑丈來收尾，佢摻幼泥委²頂背，用砂耙頓分佢掙，頂高還愛過插一支香，恁樣一滴煙都無出咧，正喊佢兜去搞。恁無簡單結起來個窯仔，這下看起來斯像一壟番薯壟樣！

園人尋個遊戲吉搞罇，遠遠斯鼻著香味咧，影著阿姆在該開窯，佢這兜遽遽行兼去看佢變奇術，阿姆驚怕番薯分佢摻綿，細心細意在該慢慢仔挖，定定仔摻，香氣錫到佢這兜口水溶溶跌，肚屎乜嘍哩咕嚕緊抗議。田塍町³，佢兜比比坐，香香個番薯塞歸嘴，天恁清，番薯恁香，在屋背個田肚，佢兜搞到斷烏正轉屋。

² 委：音 ve+；撒。

³ 田塍町：音 tien shin nen；田埂上。

¹ 燿窯仔：音 kog rhau er；燻烤番薯。